



- SENAT -

Broj: 01-12-29/19

Sarajevo, 06. 05. 2019. godine

Na osnovu člana 130. Zakona o visokom obrazovanju („Službene novine Kantona Sarajevo“, broj: 33/17) i člana 59. Statuta Univerziteta u Sarajevu, Senat je na 30. redovnoj sjednici održanoj 06. 05. 2019. godine, donio s l i j e d e ć i

ZAKLJUČAK

1. Utvrđuju se Procedure za donošenje novih nastavnih planova i programa i izmjene postojećih nastavnih planova i programa u skladu sa Pravilnikom o postupku predlaganja, ocjene, usvajanja novih i izmjena postojećih studijskih programa i nastavnih planova i programa na Univerzitetu u Sarajevu broj: 01-1101-97/18 od 19. 12. 2018. godine.
2. Procedure iz tačke 1. su sastavni dio ovog Zaključka.

Ze REKTOR

Prof. dr. Rifat Škrijelj



Dostavljeno:

- Organizacionim jedinicama UNSA
- ⊖ Službi za nastavu
- U dokumentaciju Senata
- Arhivi

10

PROCEDURA ZA DONOŠENJE NOVIH NASTAVNIH PLANOVA I PROGRAMA I IZMJENU POSTOJEĆIH NASTAVNIH PLANOVA I PROGRAMA

Ovlašteni predlagač novog studijskog programa jedno je ili više Vijeća organizacionih ili podorganizacionih jedinica Univerziteta u Sarajevu.

Uz zahtjev za predlaganje, ocjenu i usvajanje studijskog programa predlagač je dužan dostaviti dokumente na propisanim obrascima, a u skladu sa članovima 3., 4., 5., 6., 7. i 8. Pravilnika o postupku predlaganja, ocjene, usvajanja novih i izmjena postojećih studijskih programa i nastavnih planova i programa na Univerzitetu u Sarajevu, i to:

- a) odluku vijeća organizacione ili podorganizacione jedinice o predloženom studijskom programu,
- b) elaborat o studijskom programu na bosanskom/hrvatskom/srpskom,
- c) dokaze o ispunjavanju uslova u skladu sa Standardima i normativima za obavljanje djelatnosti visokog obrazovanja na području Kantona Sarajevo,
- d) finansijsku analizu predlagača o projekciji troškova i izvorima finansiranja predloženoga studijskog programa,
- e) opis postupaka osiguranja kvaliteta studijskoga programa,
- f) dvije vanjske recenzije studijskog programa, od toga najmanje jedna van Bosne i Hercegovine (Obrazac SP4) koji je sastavni dio ovog Pravilnika.

Zahtjev za predlaganje, usvajanje i ocjenu nastavnog plana i programa obavezno sadrži mišljenje sekretara organizacione jedinice o usklađenosti zahtjeva sa Zakonom o visokom obrazovanju, Statutom i Pravilnikom o postupku predlaganja, ocjene, usvajanja novih i izmjena postojećih studijskih programa i nastavnih planova i programa na Univerzitetu u Sarajevu, kao i mišljenje Odbora za osiguranje kvaliteta organizacione jedinice ili ovlaštenog tijela podorganizacione jedinice.

Zahtjev se dostavlja Službi za nastavu Univerzitetu Sarajevu koja provjerava da li je dokumentacija potpuna i da li je predložena akademska titula generisana u skladu sa Pravilnikom o sticanju i korištenju akademskih titula, stručnih i naučnih zvanja na visokoškolskim ustanovama na području Kantona Sarajevo.

Nakon što se utvrdi da je dokumentacija potpuna, zahtjev se upućuje Odboru za kvalitet koji procjenjuje validnost i kvalitetu dostavljenih dokumenata, imenuje izvjestitelja za predloženi studijski program i daje prijedlog, mišljenje i preporuku o izvođenju predloženog studijskog programa.

Prijedlog o predlaganju, ocjeni i usvajanju studijskog programa se dostavlja Senatu Univerziteta na razmatranje i dalje postupanje putem Vijeća grupacija.

Na temelju dobivenog mišljenja Vijeća grupacije, Senat će donijeti jednu od sljedećih odluka:

- Usvaja se zahtjev za uspostavu i izvedbu predloženog novog studijskog programa;
- Odbija se zahtjev za uspostavu i izvedbu predloženog novog studijskog programa.

Ukoliko je zahtjev usvojen, organizaciona jedinica je dužna studijski program dostaviti u formi info kataloga u štampanoj i elektronskoj formi 30 dana od dana usvajanja zahtjeva. Info katalog se objavljuje na bosanskom/hrvatskom/srpskom jeziku i engleskom jeziku, čiji je sadržaj sastavni dio ovog Pravilnika.

Ukoliko je zahtjev odbijen, predlagač ima pravo ponoviti zahtjev za uspostavu i izvedbu novog studijskog programa po isteku roka od godinu dana od dana donošenja Odluke Senata.

Ukoliko se donosi nastavni plan i program studijskih programa nastavničkih usmjerenja koja se provode kroz sadržajno integrirani studij, Univerzitet je dužan pribaviti mišljenje Ministarstva o njegovoj usklađenosti sa Uputstvom o zastupljenosti nastavnih sadržaja iz psihološko-pedagoške i metodičko-didaktičke grupe nastavnih predmeta u studijskim programima nastavničkih usmjerenja, **prije nego što Senat donese odluku o usvajanju novog nastavnog plana i programa**. Studijski programi nastavničkih smjerova moraju biti usklađeni sa članom 21. Pravila studiranja za I, II ciklus studija, integrisani, stručni i specijalistički studij na Univerzitetu u Sarajevu (Lista za unos elemenata: Obrazac SP3, koji je sastavni dio ovog Pravilnika).

Na osnovu elaborata u kojem se iskazuje ekonomska opravdanost prijedloga za utvrđivanje školarine, Senat dostavlja prijedlog visine školarine Upravnom odboru, koji uz prethodnu saglasnost Vlade utvrđuje školarinu koju su obavezni plaćati studenti koji sami snose troškove studija u svim statusima i svim ciklusima studija.

Kod uvođenja novog studijskog programa, za koji u važećoj Odluci o davanju saglasnosti na visinu participacije cijena usluga, upisnina i drugih troškova studija Univerziteta u Sarajevu, te fakulteta i akademija u njegovom sastavu, nije definiran iznos troškova participacije, Senat donosi odluku kojom daje saglasnost na visinu participacije troškova, odluka se dostavlja na utvrđivanje Upravnom odboru uz prethodnu saglasnost Vlade.

Ukoliko se radi o novom studijskom programu zajedničkih, interdisciplinarnih i multidisciplinarnih studija, Univerzitet je obavezan uz prethodno mišljenje Senata pribaviti i saglasnost Ministarstva za izvođenje studijskog programa. Cijenu ovog studijskog programa utvrđuje posebnom odlukom Upravni odbor Univerziteta u Sarajevu i o toj cijeni obavještava Ministarstvo.

Postupak izmjena i dopuna nastavnog plana i programa se provodi po istoj proceduri kao i njegovo donošenje.

Uz zahtjev za izmjenu nastavnog plana i programa u okviru postojećeg studijskog programa predlagač je dužan dostaviti sljedeće dokumente:

- a) predložene izmjene nastavnog plana i programa,
- b) razloge za izmjene nastavnog plana i programa.

Navedene izmjene se navode po generičkim deskriptorima kvalifikacijskih nivoa sadržanim u odluci o usvajanju osnova kvalifikacijskog okvira u Bosni i Hercegovini („Službeni glasnik Bosne i Hercegovine“, broj 31/11)

